



Njerëzit, për nga natyra e tyre, e duan njeriun që është fjalëbutë, i cili nuk cenon nderin e askujt dhe nuk e lëndon askënd. Ata e duan, njëkohësisht, edhe njeriun e buzëqeshur dhe fytyrëçelur, njeriun mendjemprehtë dhe njeriun që i këshillon për gjëra të mira. Për këtë arsye, i Dërguari i Allahut, Muhammedi, paqja dhe lavdërimi i Allahut qofshin mbi të, interesohej për shkaqet që ndikojnë në përfitimin e zemrave.

Për këtë arsye, i Dërguari i Allahut, paqja dhe lavdërimi i Allahut qofshin mbi të, thoshte:

*"Ju nuk do t'i përfitoni njerëzit me pasurinë tuaj, por ata i përfiton fytyra e çelur dhe morali i mirë."*<sup>[1]</sup>

I Dërguari i Allahut, paqja dhe lavdërimi i Allahut qofshin mbi të, gjithashtu thoshte:

*"Më së shumti i dua njerëzit që kanë moral më të mirë, që janë krahëlëshuar dhe që sillen butësisht me njerëz, ndërsa më së shumti i urrej ata që bartin fjalë, ata që i ndajnë të dashurit dhe ata të cilët pafajësisë ia veshin turpin."*<sup>[2]</sup>

I Dërguari i Allahut, paqja dhe lavdërimi i Allahut qofshin mbi të, gjithashtu thoshte:

*"Mos nënçmoni asnjë punë të mirë, qoftë edhe nëse e sheh vëllanë tënd me fytyrë të çelur!"*<sup>[3]</sup>

Ai thoshte gjithashtu:

*"Buzëqeshja jote në fytyrën e vëllait tënd është lëmoshë, urdhërimi për mirë dhe ndalimi nga e keqja është lëmoshë, udhëzimi që ia jep njeriut që ka humbur rrugën është lëmoshë, heqja e pengesës, e gjembave dhe e eshtrave nga rruga është lëmoshë dhe hedhja e ujit nga kova jote në kovën e vëllait tënd është lëmoshë."*<sup>[4]</sup>

I Dërguari i Allahut, paqja dhe lavdërimi i Allahut qofshin mbi të, thoshte gjithashtu:

*“Edhe fjala e mirë është lëmoshë.”*<sup>[5]</sup>

Ai po ashtu thoshte:

*“Ushqeji njerëzit, përhape selamin, ji fjalëmirë dhe falu natën kur njerëzit flenë do të hysh me paqe në xhenet!”*<sup>[6]</sup>

Marrë nga libri “Muhammedun Resulullah” i autorit Ahmed El-Mezjed

Përktheu: Jusuf Kastrati - Shembulli.com

---

<sup>[1]</sup> Hadithin e transmeton Bezzari (8544).

<sup>[2]</sup> Hadithin e transmeton Taberaniu (835).

<sup>[3]</sup> Hadithin e transmeton Muslimi (4760) dhe Tirmidhiu (1756).

<sup>[4]</sup> Hadithin e transmeton Tirmidhiu (1879).

<sup>[5]</sup> Hadithin e transmeton Buhariu (2767) dhe Muslimi (1677).

[\[6\]](#) Hadithin e transmeton Ahmed (9996).